

Sr. Nelson Sprok: un trayectoria di 50 aña na Aruba:

Cu perserverancia, amor y hopi fe den Dios a edifica un famia y lanta un negoshi prospero



ORANJESTAD (AAN) - Matutino DIARIO a entrevista señor Nelson Sprok, ken dia 13 di Maart a cumpli 50 aña di a bin biba na Aruba, y a bin cu e compromiso di traha duro y percura pa un futuro yen di progreso y bendicion, como un persona di Fe grandi den Dios. Señor Sprok a conta nos cu e ta corda cu 50 aña pasa, ora cu el a worde pidi pa bin traha na Aruba, locual el a haci ta pidi su tio conseho, y el a bise pa e bin "pasobra nunca bo no sa unda bo ta".

Wel, mi a bin cu esey den mi mente y awe e palabranan mes cu mi ta papia aki, mi ta sinti un alegria inmenso door cu e ta algo asina bunita cu a sosode despues, den mi bida, den tur e 50 añanan aki, dunke cu mi a haya hopi golpi, pero den nomber di Señor Todopoderoso, mi a logra cu te awe, mi por bisa cu danki. Pasobra e prome dia cu mi a yega Aruba mi no tabata tin net, net nada di loke mi tin actualmente. Mi a cuminsa for di cero!", sr. Sprok a relata.

El a agrega cu e ta sinti su mes orguyoso di ta na Aruba y contento, pasobra no tin un hende cu conoc'e na Aruba. Manera sa sosode cu tur persona, por tin hende cu ta guste, pero e no tin problema cu ningun hende, y e kier ta semper trankil pa tur cos bay manera mester ta.

"Un di e hefenan di ELGA Aruba a bin for di Curacao pa traha y el a manda busca mi, pa mi bin pasobra segun'e mi tabata un di e mehornan den e parti di tubería. Y berdaderamente, despues di esey cosnan no a sigui bay

mucho bon den e compania, y despues mi a bay traha na e compania di plomeria Loustra NV", sr. Sprok a comenta.

E tempo ey un accidente di avion a sosode, unda cu tres Marinier a muri, y sr. Sprok a fura e cahanan di morto completamente cu zinc, e tempo ey na San Pedro Hospital (awe Paviljoen) pa haci e trabao aki, pa por a manda e tres marinier na Hulanda.

Despues di nueve aña, mas of menos, señor Sprok a cuminsa cu su propio negoshi, prome su so y despues den sociedad cu un amigo.

"El a dicidi di kita for di su trabao pa bin traha cu mi, y mi a ricibi cu man habri, pero nos a wanta cuatro aña, despues e sociedad a kibra pa circunstancianan fuera di alcance", señor Sprok a relata. Actualmente e compania CONAR NV tin 40 aña di existencia.

Nelson y Lucia Sprok tin 42 aña casa, y esaki ta e parti mas bunita di e historia di e binimento pa Aruba di sr. Sprok.

"Lucia su ruman muher tabata casa cu un amigo di mi, tambe di Curacao, anto nan a bin caminda mi tabata biba y mi a saluda Lucia, pero di e saludo ey el a keda den un amistad cu a crece poco, poco, te cu nos a yega di bira novio y awendia nos tin 40 aña casa", señor Sprok a bisa.

Di nan union a nace tres yiu cu ta Jose Mario, Kays y Luskyes y Dios a bendiciona nan cu cuatro rieto.

E formula pa tene un famia stabil y yega 42 aña casa mustrandó hoben, bon tehi, ta simplemente tin compren-

awendia, caminda mi ta aworaki y pesey mi ta hopi contento na Aruba", el a expresa.

Señor Nelson Sprok ta haci trabao boluntario cu diferente instancia di indole social, y cu su caha di orgel el a biaha na Curacao y Bonaire.

"Aworaki mi tin 21 aña como tocador di caha di orgel, y mi a siña di mi mes hunto cu Patan. E ta un pasatempo y mi ta bay hopi como boluntario pa trece alegria cerca nos grandinan na tur Paviljoen, sea San Pedro, Maris Stella, San Nicolas, Kibrahacha, Cas Marie, etc., locual mi ta haci cu un amor grandi", sr. Sprok a relata.

Tambe sr. Sprok tin su cunucu cual e ta cuida tambe cu hopi amor.

"E trabao ta hopi duro y si bo no tin amor pe, e ta mata bo. Mi ta cosecha berdura manera spinashi, calbas, con-comber blanco, yambo, con-comber chikito, pampoena, etc., y tambe fruta manera papaya, bacoba, guyaba" sr. Sprok a agrega.

Cu un trayectoria di 50 aña

largo na Aruba, cu el a pasa den temponan bon y den temponan dificil, cu reto fuerte y perseverancia pa vence nan, sr. Sprok tin un mensahe pa tanto Arubiano como tambe pa tur hende cu ta bin biba na Aruba, y cu tin biaha ta keha cu nan no tin trabao, cu nan no ta logra di bay dilanti: "Si

bo a bin di otro lugar bo tin cu adapta bo mes na e sistema di e pais, pero si cada bez bo ta menciona cu bo ta di otro lugar y bo ta laga bo pida pan cay, bo no ta logra. Ami nunca a haci esey, pero semper mi a zorg pa adapta mi mes na Aruba y mi a bin pa traha y traha duro pa bay dilanti", sr. Sprok a indica. Ainda e ta activo y e ta sinti mescos cu un hoben di 17 aña di curazon. "Mas bo move mehor pa bo", el a remarca.

Señor Sprok tin hopi amor pa su trahadornan, kendenan e ta mira como parti di su famia, y semper cu e tin un celebracion su trahadornan ta central den dje. Esaki ta algo masha bunita mes, y por ripara cu el a gana e cariño tambe di su personal.